


IBU & ANAK segeran KERJAYA

EMANG RAMAI IBU BAPA YANG MAHU ANAK-ANAK MENGIKUT JEJAK KERJAYA MEREKA, TETAPI TIDAK PADA ANAK-ANAK. NONA BERTEMU TIGA WANITA PROFESIONAL YANG BERTUAH KERANA MENJADI IDOLA ANAK-ANAK. KERJAYA PERSONALITIINI MENJADI SUMBER INSPIRASI ANAK-ANAK MEREKA UNTUK MELANGKAH LEBIH YAKIN DAN BERJAYA.



Datuk Dr. Nor Ashikin &
Dr. Liyana Dhamirah

berkongsi Kepakaran Perubatan



PROFIL

Nama : DATUK DR. NOR ASHIKIN MOKHTAR

Usia : 50 TAHUN

Jawatan : PAKAR OBSTETRIK & GINEKOLOGI, PENULIS BUKU, KOLUMNIS & PEMILIK PUSAT PERUBATAN PRIMANORA

Pencapaian

: PENERIMA PINGAT 'PANGLIMA JASA NEGARA' (2005)
MERAWAT LEBIH 10,668

: PENGERUSI BERSAMA JAWATANKUASA NUR SEJAHTERA, PROGRAM KESIHATAN WANITA PERINGKAT KEMENTERIAN

: PENSYARAH SAMBILAN JURUSAN PERUBATAN (O&G), UKM,

: BERGIAT AKTIF MEMBERI CERAMAH DI HOSPITAL KERAJAAN DAN SWASTA

Angin petang bertiup santai, nyaman melatari persekitaran Pusat Perubatan PrimaNora di hujung deretan lokasi elit, TTDI Plaza. Berdiri di pintu kaca, Datuk Dr. Nor Ashikin melambai mesra, masuklah, jemputnya sambil menguak pintu VIP. Stunning! Itu reaksi pertama saya kala menginjak ruang menunggu yang mewah. Penataan dekorasi dihias chandelier dan kertas dinding sepadan, menambah seri moden rona merah putih yang berkilaauan.

Buat seketika, suasana riuh dengan kemesraan dan gelak tawa. Datuk Nora (panggilan mesranya) begitu energetik dan ceria, ditemani gadis permata hati, Dr. Liyana Dhamirah, kami dibawa melawat bilik pemeriksaan dan rawatan. Kebetulan hari Ahad sememangnya ditutup kepada umum, justeru kesempatan ini kami bersantai-santai, bercerita dan berjenaka seperti teman lama. Sifat ramah dan spontan Datuk Nora langsung tidak menimbulkan jurang sepanjang temu ramah dijalankan, sayugia, tidak hairanlah wajahnya cukup popular dan disenangi media.

Barangkali nama Datuk Nora sudah tidak perlu diperkenalkan lagi. Siapa yang tidak mengenali wanita jelita kacukan Melayu, India dan Belanda ini? Beliau menempah puncak kerjaya sebagai doktor pakar Obstetrik dan Ginekologi (O&G), kerap kali wajah ini muncul memberi



PROFIL

Nama : DR. LIYANA DHAMIRAH DATUK DR. AMINUDDIN

Usia : 26 TAHUN

Jawatan : PEGAWAI PERUBATAN SISWAZAH

Kelulusan : MBBS BCH BAO, NATIONAL UNIVERSITY OF IRELAND

: PRA-KLINIKAL, ROYAL COLLEGE OF SURGEONS, IRELAND

ceramah, berkongsi pengetahuan perbidanan dan sakit puas menerusi televisyen, seminar serta penulisan artikel di media cetak. Kini puteri sulungnya mengikut jejak, bergelar doktor dan menyumbang khidmat kepada masyarakat.

REZEKI KAHWIN AWAL

Raut wajah Dr. Liyana begitu seiras dengan Mummynya. Tidak hairanlah dia turut mengikut gaya penampilan Datuk Nora, sentiasa anggun bersolek rapi. Sungguhpun bergelar doktor, ia tidak menghalang mereka mengikut arus gegaran fesyen, malah Dr. Liyana menyenangi prinsip ibunya bahawa tugas seorang doktor bukan sekadar merawat pesakit tapi turut memberi harapan agar mereka segera sembuh. Beliau sendiri menggemari koleksi kemeja Raoul hijau yang dikenakkannya untuk sesi fotografi hari ini. Sememangnya Datuk Nora sentiasa mendidik puteri-puterinya agar rajin menjaga penampilan di depan khalayak.

Mengimbau kenangan lama, Datuk Nora bercerita kepada saya tentang pengalamannya membesar Dr. Liyana. "Kehadirannya memang satu cabaran besar. Masa tu saya dan suami masih menuntut bidang perubatan, jadi bayangkan kami berkongsi wang biasiswa sebanyak RM350 seorang untuk menyara hidup kami bertiga. Semasa belajar, kami terpaksa bergilir-gilir menjaga, pernah juga menyorok-nyorok, seludup Liyana ke bilik hostel. Pagi lepas dimandikan, kami hantar dia ke rumah babysitter di Kampung Baru, kemudian jemput semula selepas kelas jam 6 petang sehingga kami mampu menyewa sendiri di luar. Lebih mengharukan, seminggu lepas bersalin saya sudah berjalan ke bilik kuliah! Ibu sendiri pernah menangis, pada mulanya dia marah dan katanya saya takkan berjaya.

Kata-katanya itu membakar semangat agar saya lebih kuat dan cekal. Saya tak menyesal, saya percaya Liyana merupakan rezeki saya dan suami kerana berkahwin awal." Usaha yang diiringi tadahan doa sememangnya meletakkan Datuk Nora dimana beliau kini berdiri. Hasil perkongsian hidup selama 28 tahun dengan Profesor Datuk Dr. Aminuddin Ahmad mengurniakan mereka lima cahaya mata, dua daripadanya terlibat dunia perubatan. Terdetik pertanyaan, apakah minat atau anak-anak 'disuruh' menjadi doktor seperti ibu dan ayah? "Oh no, my parent tak pernah paksa. Minat tumbuh sejak di sekolah menengah lagi. Kemudian saya ditawarkan kursus matrikulasi sebelum dapat peluang biasiswa dalam bidang ini. Tanpa ragu-ragu, saya terus bersetuju sehingga dapat melanjutkan pelajaran di Ireland. Kejayaan Mummy sampai ke tahap ini memang membanggakan dan secara

individu, saya menyanjungi ketabahan beliau, sentiasa inginkan yang terbaik dan sentiasa ingin menggembirakan kami semua. Mummy dah banyak beri sumbangan keilmuan kepada masyarakat tapi dia masih belum rasa puas." Ujar Dr. Liyana sebelum dicelah ibunya.

"Ya, kerjaya sekarang begitu dekat dengan jiwa saya. Ia bukan sahaja sumber mata pencarian tapi inilah peluang saya melakukan amal jariah dengan ilmu yang ada. Ia tak pernah habis malah menjadi saham saya di akhirat nanti. Bidang O&G mendekatkan diri dengan golongan wanita, kerana saya juga wanita, ibu dan isteri, saya tahu masalah seperti mana yang dihadapi mereka. Saya belum puas menyumbang khidmat, masih sihat untuk menyebarkan pengetahuan, memberi ceramah, menulis buku dan jurnal, malah saya masih ada tenaga menguruskan pusat kesihatan sehenti wanita ini! Di PrimaNora, saya berusaha mengadunca rawatan kecantikan dan diagnosis kesihatan agar wanita beroleh keseimbangan dalam dan luaran. Sebetulnya Liyana banyak membantu dalam urusan dekorasi dan hiasan dalaman, jadi saya berharap suatu hari nanti dia dapat meneruskan legasi saya di masa depan."

Menurut Datuk Nora, beliau sentiasa mementingkan pengurusan dan perancangan yang teratur untuk kerjaya dan rumah tangga. Beliau mengakui, kesibukan tugas memaksanya menyerahkan sebahagian tanggungjawab rumah kepada pembantu. Namun itu bukan bermakna urusan sebagai ibu diabaikan. Datuk Nora dan suami menyediakan segala keperluan yang penting untuk tumbesaran anak-anak, memberi pelajaran dan didikan dengan penuh kasih sayang.

Sambil bergambar, Dr. Liyana memeluk erat pinggang Mummy dan adiknya, Anisah. Sungguhpun dia selalu beranggapan Mummy bekerja terlalu kuat untuk keluarga, namun wanita yang melahirkannya ini tetap istimewa dan luarbiasa. "Saya dan Mummy masing-masing ada fikiran tersendiri. Adakalanya pendapat kami berbeza tapi biasanya beliau menjadi tempat rujukan saya mengenai hal perubatan. Maklumlah Mummy seorang pakar dan punya banyak pengalaman jadi secara tidak langsung ia memberi kelebihan kepada doktor baru bertugas seperti saya.

Kami berdua ni gila-gila sikit. Kalau pergi bercuti, saya dan Mummy akan menyanyi dan menari bersama-sama. Saat-saat sebegini sememangnya manis bila dikenang, tapi sekarang sejak terlibat kerjaya perubatan, kami sukar bertemu kerana sibuk dengan tugas masing-masing. Hanya panggilan suara dan SMS yang menghubungkan kami. Kadang-kadang Mummy terpaksa mengatur lunch date dengan saya supaya kami dapat bersantai dan meluangkan masa bersama."

"Liyana bagi saya seorang yang berdedikasi, determined dengan apa yang diinginkan dalam kehidupan. Sebagai ibu, ya, sudah tentulah saya ingin melihat dia berjaya lebih dari apa yang saya kecapi sekarang dan tentu sekali terus menyumbang bakti kepada mereka yang memerlukan. Biarlah dia menjadi contoh kepada adik-adiknya." Harapan dan doa seorang ibu semestinya mudah dimakbulkan Tuhan. Jasa ibu terhadap keluarga dan rumah tangga tidak pernah berhenti, sejak dari saat dia mengusung perut 9 bulan 10 hari sehingga ke akhirnya, ibu tetap membakar diri buat kebahagiaan anak-anak.

Kenangan bertemu Datuk Nora dan Dr. Liyana sememangnya menjadi contoh bahawa ibu dan anak bisa berkongsi kerjaya. Sebelum berlalu, Dr. Liyana sempat mengucapkan jutaan terima kasih kepada Mummynya kerana sentiasa membantu walaupun tanpa dipinta. "Thanks for always being there when I need you. I appreciate it and I love you so much, Mummy!"

